

Date – 06/04/2025

Time - 18:30 Hrs

1. Mizoram leh Assam ramri buai chingfel tuma state pahnih official-te Guwahati a an inbiak hun atan April ni 25 ruat a ni.
2. Home minister Pu K. Sapdanga'n Lengpui tumhmunah ramdang atanga lo zinte endik hna thawh tan a nih thu a sawi.
3. Tamil Nadu-a Cheng vbch 550 senga dawh, Pamban lei, Prime Minister Narendra Modi-a'n a hawng.
4. Ramchhung state engemawzatah khua nasa takin a lum zual thei tih IMD-in a sawi.

<><><>

BORDER TALKS

Mizoram leh Assam ramri buai chingfel tuma state pahnih official-te Guwahati a an inbiak hun atan April ni 25 ruat a ni.

Home minister Pu K. Sapdanga'n Akashvani Aizawl a hrilh danin Assam sorkar lamin April ni 25-a state pahnih official te ramri buai chungchang sawi tura an rawn rawtna chu a thuphunga pawm a ni a. An tum dan chuan April ni 24-ah Aizawl chhuahsanin a tukah Guwahati khawpui-ah an inbe dawn a ni. Home department hotute chuan tunge Mizoram ai-awha kal turte tih hi tih chian fak a la awm loh thu leh an hun hman dan tur pawh rawtna a awm chungin sorkar pawmpuina nghah mek a ni an ti. Nikum August ni 9 a Aizawl a Assam leh Mizoram minister-te inbiakna-ah khan kumin March ni 31 ral hma ngei a Guwahati a inbiak chhunzawm ni se tiin thu dah a ni a. Mahse, Mizoram sorkarin state pahnih minister-te inbiak hma-in official-te inbe phawtin inrem lohna la awmte chingfel hmasa phawt se ti a a rawtna chu Assam sorkarin a chhang lawk lova. Vawi 3 zet lehkha an thawh hnu-ah Assam lam hian state 2 official-te inbiak phawt chu an remti ta a, a hun turah thutlukna an siam tlai avangin tunah hian inbe turin ruahmanna siam a ni ta chauh a ni.

Nikum August ni 9 khan Mizoram aiawh home minister Pu K. Sapdanga kaihhruai leh Assam aiawh an border protection & development minister Pu Atul Bora kaihhruaite chu ramri buai chinfelna atan Aizawl-ah an inbia a. Hetah hian thuchhuah intawm siamin kumin March ni 31 hma-a inbiak chhunzawm ni se an ti a, an tum angin inbiakna an chhunzawm hman ta lova. State pahnih inkar ramri-ah dinhmun pangngai bak engmah chet thawh lo tura intiamin chu chu bawhchhiat a awm lo ni a thudawn a ni.

State pahnih official-te inbiak hnu-ah hian minister te an inbe leh tura ngaih a ni a. An inbiak leh chuan inbiak vawi 5-na tur a ni dawn a. Sorkar hmasa hunlai khan chief minister pahnihte vawi 2 an lo inbe tawh bawk a ni.

<><><>

MINOR DRIVING

Supreme Court Committee on Road Safety thupek angin kum tling lova lirthei khalhte chik zawka endik turin Transport department-in DTO te a hriattir.

Supreme Court Committee on Road Safety chuan lirthei chetsualna a tlak hniam theih na'na State zawng zawng hnena tih tur leh hmalakna tur a duan hrang hrangte chu Mizoram Transport Minister leh a kaihhnawih department hrang hrang te nen ngaihtuah ho a ni a. Hetah hian Supreme Court Committee on Road Safety in a ngaih pawimawh em em kum tlinglo lirthei khalh thin te chungchang ngaihtuah hoin, District Trasport Office (DTO) zawng zawngte chuan kum tling lo lirthei khalh thinte nasa leh chik zawka lo endik thin tur leh dan bawhchhia te chu Motor Vehicle Act, 1988 tlawhchhan a hrem ngei tur leh dan bawhchhia, hremna pek te chu fel taka chhinchhiah thin turin a ti a ni.

He thupek hi March ni 20 khan chhuah a ni a. He mi rual hian zirlaite chuanna school/institution bus a zirlaite him zawk na'n Mizoram-a zirna in bus ten an phurh theih tawk ai a tam zirlai phurh loh tur tih thuchhuah siamin, dan dinglai angin zirna in bus reng reng chuan an phurh theih zat bus bang chhung leh pawnah an ziak ngei ngei tur a ni a. He thupek hi bus neitu zawng zawngte'n an zawm ngei ngei tur a ni a, thupek zawm lote chu dan anga hremna pek a nih tur thu Transport Department chuan a sawi a ni.

<><><>

ASF UPDATE

Thla hlui March ni 20-a African Swine Fever vawk pulhri leng thar leh finfiah a nih atanga vawiin thlengin he vawk pulhri avang hian Mizoramah vawk 1,163 a thi leh tawh.

Animal husbandry & veterinary department hotute hnen atanga thu dawn danin vawiin khan Siaha a veng 15-ah vawk 40 a thi a. Lawngtlai khawpui-a veng 2 – Lawngtlai-4 leh Council vengah 2 ve ve thi-in Lawngtlai khua a thi hi 4 a ni a. Mamit district a Zawlnuam khua-ah pahnih a thi bawk a. Vawiina ASF vawk pulhri avanga vawk thi hi 46 a tling a. A hma khan Siaha khawpui-a March thla chawhnu lama vawk thi report tlai a nih avangin Siaha khawpui veng 20 a a hmalama thi nena belhkhawmin Zirtawpni khan vawk thi 343 report alo lut a ni.

Tun dinhmunah district 4 - Lawngtlai, Mamit, Siaha leh Lunglei a veng 39-ah vawk pulhri hi a leng mek niin Vety department hotute chuan an sawi a. Vawiinah khan district 3, Mamit, Siaha leh Lunglei-ah vawk 12 suat a ni a. Lunglei khawpui-ah hian nimin khan veng pahnihah vawk 3 thi-in Lunglawn venagh vawk 14 suat a ni bawk a, Lunglei khawpuiah vawiinah vawk thi a awm lo chungin vawk 3 suat a ni. Heti hian kumin chhunga vawk suat tawh zawng zawng chu 372 a tling tawh bawk a ni.

<><><>

HM ON PAR

Home minister Pu K. Sapdanga chuan sorkar laipui duhdan angin Lengpui tumhmunah ramdang atanga lo zinte endik hna thawh tan a nih thu a sawi.

Pu K. Sapdanga chuan sorkar laipui-in Myanmar ramri depa awm hmarchhak ram pathum Manipur, Mizoram leh Nagaland a protected area permit (PAP) leh restricted area permit (RAP) a thlahdulna a tihtawp leh tak avangin ramdang atanga lo zinte'n phalna an neih lo endikna atan Lengpui tumhmun a thlawhna atanga lo thlengte luhna hmun bulah hmun ruahman a ni, a ti a. Official lamin ruahmanna an siam tawh angin kalpui chhoh tur a ni a ti. Hemi chungchangah hian Mizoram sorkar leh ministry of home affairs (MHA) chu an inrawn tlang reng niin a sawi. Protected area regime an tih mai hi kum 14 thlahdul a nih hnu-ah ram thenawm Myanmar leh Bangladesh boruak avangin a taka hman leh turin nikum December thla khan MHA chuan thupek a chhuah leh ta a ni.

Home department hotute'n an sawi danin ramdangmi Mizorama lo zinte khuahkhirhna tuaithar leh a nih hnu hian RAP leh PAR hi online hmanga dil theihin MHA chuan a siam a, online hmang bawka phalna pek a ziahluh an ni tawh dawn a. He thil a taka kalpui tur hian home department chuan district tina SP-te bakah foreigner registration officer, SP CID (SB) te pualin training a lo buatsaih tawh a. MHA hnenah pawh ramdangmi lo zinte ziahluh leh lo buaipui kawnga thiltih a awlsam theih nan Aizawl khawpui-ah hemi pual bik pisa hi rawn din turin ngen a ni bawk.

Hemi chungchangah hian March ni 10 khan chief minister Pu Lalduhoma chuan sorkar laipui inventhawanna chu a hriatthiampui thu assembly inkhawmah a lo sawi tawh a. Nikum chawhnu lam kum chanve vel chhungin ramdangmi 2,000 chuang Mizorama lo lut si-in khaw lai-ah hmuh tur an awm lo niin a sawi a.

A bikin UK mi, Russia leh Ukraine indona a kal pakhat chu Mizoram kaltlangin Myanmar ramah a lut a, hel pawlte indo dan a zirtir niin Pu Lalduhoma chuan a sawi a. A lo haw lam silaimu nen Lengpui tumhmunah man ani a ti a, Ramdangmi lo zinte khuahkhirh chu Mizoram sorkar chuan tha ti lo chungin sorkar laipui rilru erawh a hriatthiampui niin chuan a sawi a ni.

<><><>

ILP

Nikum chhung khan inner line permit (ILP) pangngai 7,927 pek chhuah a ni a, ILP pek chhuah zinga mi 5,675-te chuan an an ILP hi tinungin pawhsei sak leh an ni.

General administration department (GAD) hotute sawi danin nikum chhung khan temporary ILP mi nuai 1, sing 2, sang 9 leh 953 hnenah pekchhuah a ni a, pawhseisak an awm lova. Temporary stay ILP mi 238 hnena pek a ni bawk a. Kum 2 chhung nung chi ILP mi 18 hnena pek a ni bawk. GAD hotute chuan Mizoram-a Inner Line Permit kalphung chu a tul anga en nawn a, changtlung zawka siam mek zel a ni tih an sawi a, District bawrhapse'n Manual-a an pek thin Regular ILP leh kum 2 atana ILP pekte chu nikum November thla atang khan online-a pek a ni tawh a. Hemi hma hian kum 2023 atang khan temporary ILP leh rei lote hun chhung a Mizorama cham theihna (temporary stay permit)-

te chu online-a pek tan a lo ni tawh bawk. Heng online-a ILP pek chhuah te hi awlsam taka a tak leh a lem enfiah a nih theih na'n Information & Communication Technology Department-in mobile application an siam a. Hei hi tangkai taka hman a ni a. ILP inkaihhruaina hman mek pawh siam that tura ruahman mek a ni.

Rel chawlhmun awmna Bairabi khuua ILP pekna atan ruahmanna thar a awm lo a. Amaherawhchu, ILP check point ah mobile application hmanga lo endik thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar hi puan leh a ni ang.

<><><>

PM INAUGURATES

Tamil Nadu-a lei inkhai sawn thei dawh chu vawiin khan Prime Minister Narendra Modi-a’n a hawng a, lei hnuai tuipuia lawng kal tlang hmasa ber, Coast Guard lawng a vailiam bawk.

Cheng vbch 550 senga dawh, Pamban lei hi kum 58 chhung daih tura ngaih a ni a, a hnuaiyah zalen taka lawng an kal tlang theih nan khawl hmangin meter 17-a sang thleng a khai chhoh theih a ni.

Prime Minister hian cheng vbch 8300 senga rel leh motor kawnga Rameswaram kal pawh theihna tur project a hawng bawk.

<><><>

HEAT WAVE

Khaw chin thlirtu, India Meteorological Dept (IMD) chuan ramchhung state hrang hrangah nasa takin khua a lum zual thei tih a sawi a, Gujarat, Punjab hmar lam, Haryana hmar lam, Chandigarh, Jammu, Kashmir, Ladakh, Himachal Pradesh, Uttarakhand thlang lam lam bial, Bihar hmar lam, Sub Himalayan West Bengal, Sikkim leh Assam thlang lam bial-ah te chuan a lum dan tur pangngai aiin Celcius degree 3 atanga 5-in a lum zawk a, Gangetic West Bengal, Arunachal Pradesh leh Assam hmun dang zawngah pawh a lum dan tur pangngai aiin degree 1 atanga 3-in a lum zawk a ni.

<><><>

US STORM

Ruah leh thlipuiin US state hrang hrang a nuainaah mi 16 aia tlem lo an thi a, ni engemawzat nasa taka ruah a sur tawh avangin sabereka khuangkaih thleng thei laka fimkhur tura hriattirna chhuah a ni.

Ruahsur nasa Tennessee state-in tuar nasa berin mi 10 an thi tawh a, Kentucky, Missouri leh Arkansas-ah te pawh tuilian leh leimin avangin hmun tam takah kawng a ping a, tuilian mai thei avangin lui kam bul khuua chengte chu hmun him lama inthiar chhuak tura hriattir an ni.

<><><>